

四庫全書

史部

欽定四庫全書

史部

欽定續通志卷五百九十九
四至

侍講學士_臣羅國俊覆勘

總校官原任侍講_臣王燕緒

欽定四庫全書

欽定續通志卷五百九十四

載記

臣等謹按五代之際天下瓜分黠髡盜敗之徒乘時而起各挾智力擅固封疆福衆之間為閩江以下為吳為南唐劍以南及山南西道為前後蜀湖北為楚浙東西為吳越嶺南北為南漢太原以北為東漢而荆歸峽三州為南平此十國者莫不

自制位號爭相雄長其行事既不統於中朝故歐陽修五代史別為十國世家然攷世家之名史遷以紀侯國業既建國僭號帝制自為即不得與諸侯王比晉書以張軌李嵩編於列傳鄭樵謂其自相悖戾因與劉淵石勒慕容廆等並列入載記厥體肆矣五代如吳南唐前後蜀南漢東漢閩七國皆改元稱號楚及吳越南平雖受命中國陽奉正朔然割據偏方各君其土與僭偽相若不可不別

其主名今悉改為載記以符鄭例至夏國世有西
土歷宋遼金之際雖服事朝廷而徇卿不常考德
明於祥符間已追帝其父逮元昊乃始顯稱厥後
因之此當為僭國而不得為外臣也遼史列為外
紀宋金二史入之列傳今並改入載記附十國後
庶於通史體例為得云

吳

楊行密

渥

隆演

溥

附田頔

安仁義臺濠

朱延壽

楊行密字化源廬州合肥人為人長大有力能手舉百

斤唐乾符中為盜江淮間刺史鄭榮

新唐書作榮

捕得奇其

貌縱之後應募為州兵戍朔方遷隊長

按新唐書作秦宗權寇廬壽間

刺史募殺賊行密以功補隊長

歲滿代還而都將惡之使復出戍將行

過都將舍都將陽為好言問所欲行密奮然曰惟少公

頭爾即斬之因起兵為亂自號八營都知兵馬使刺史

郎幼復棄城走遂據廬州

按通鑑作刺史郎幼復不能制薦於淮南節度使高駢請

以自代遂以行密知廬州與歐史異

淮南節度使高駢因表為廬州刺史

乃以田頔為八營都將陶雅為左衡山將討定鄉盜駢將呂用之恐行密難制遣俞公楚以兵五千屯合肥名

討黃巢而陰圖之行密擊殺公楚時張教據壽州許勅

據滁州與行密拏戰又舒人陳儒攻刺史高瀘瀘來告

難行密未能定賊吳迴李本逐瀘據其城行密據之取

舒州尋為勅所奪光啓二年張教遣將魏虔攻廬州李

神福田頔破之楮城

按行密擊殺俞公楚及取舒州等事歐史俱失載今據新唐書行密

傳增輯

駢為畢師鐸秦彥所攻用之以駢命署行密行軍司

馬趣其進援客表襲說行密亟督兵往可得其地行密乃率兵而東行至天長而駢已為師鐸所囚揚州陷行密不得入屯於蜀岡用之以兵屬之彥以奇兵出擊破行密一屯行密益甲出戰初合陣行密陽敗棄營走彥兵爭入營收軍實反兵擊之師鐸大敗單騎走入城遂殺駢行密縞軍向城哭三日攻其西門彥及師鐸奔東塘行密遂入揚州時城中倉廩空虛飢民相食行密不

能守欲走而蔡州秦宗權遣其弟宗衡掠地淮南彥及師鐸與宗衡合行密閉城不敢出已而宗衡為偏將孫儒所殺儒攻高郵破之行密益懼襲曰吾以新集之衆守空城而淮南諸將多駢舊人未嘗結以恩信今儒兵方盛所攻必克不若避之行密誘殺海陵鎮使高霸得其兵數千已而孫儒殺彥及師鐸并其衆以攻行密行密欲走海陵襲曰海陵難守廬吾舊治也城廩完實可為後圖乃走廬州既又欲趨洪州襲曰鍾傳新得江西

勢未可圖趙鋁新得宣州其人非公敵此可取也行密乃引兵濟枰潭與孫端趙暉等戰於采石敗之疾趨蜀山堅壁以待鋁將蘇瑋率兵二萬對屯行密分兵四出伐木開道瑋驚北遂圍宣州鋁棄城走獲之斬首送汴唐昭宗拜行密宣歙觀察使時廬州守蔡儔以城降儒儒進攻行密於宣州行密復入揚州結時溥與梁太祖為助而兵數敗乃退還宣州遣田頔等取蘇常潤州唐以宣州為寧國軍授行密節度使大順二年儒屯廣德

其將康旺取和州安景思取滁州李神福擊破之得其

二州

按新唐書孫儒傳行密取常潤皆在大順元年昭宗本紀行密陷蘇常潤亦在大順元年取和滁二

州則在大順二年歐史作龍紀元年取蘇常潤州三年取和滁二州考龍紀次年即改元大順並無二年顯係歐

史之誤今從新唐書改正秋儒焚揚州廬舍驅其衆渡江號五十萬

攻行密諸將田頔劉威等遇之輒敗行密欲走銅官客

戴友規曰儒氣銳兵多利速戰宜持久以敝之若避走

是就擒也劉威亦以為言行密乃止久之儒兵食盡又

大疫行密悉兵擊儒擒斬之收餘兵數千以皂衣蒙甲

號黑雲都以為親軍

按新唐書及五國故事行密徵時居常獨處必見黑衣人侍側後有

銳士五千遂患以黑繒幕其首號黑雲都載在攻取宣州之前非破儒後始有是號也

唐拜行密

淮南節度使乾寧二年加檢校太傅同平章事封弘農

郡王行密以田頔守宣州安仁義守潤州昇州刺史馮

弘鐸來附分遣顧等攻下淮南江東諸州時蘇州復為

錢鏐所據進攻破之

按唐昭宗本紀行密於大順元年攻陷蘇州尋為孫儒所奪至景福

元年蘇州復入於越故此又破蘇州也改史未晰今改輯

四年兗州朱瑾來奔江淮

兵素輕弱得瑾勁騎而兵益振梁太祖遣葛從周龐師

古攻壽州行密擊敗之殺師古復追敗從周于潁河光

化元年

按乾寧四年其明年改元光化
改史作五年者誤今改正

錢鏐攻蘇州及周

本戰于白方湖本敗蘇州復入越天復元年遣李神福

攻越大敗之於臨安擒其將顧全武以歸二年馮弘鐸叛

襲宣州及田頔戰於曷山弘鐸敗將入海行密至東塘

遣人慰留之弘鐸感泣行密從十餘騎馳入其軍以弘

鐸歸為節度副使以李神福為昇州刺史時唐昭宗在

岐拜行密東面諸道行營都統檢校太師中書令封吳

王且來告難詔與岐晉諸鎮大舉討梁乃以李神福為
鄂岳招討使劉存副之攻杜洪馬殷以分梁勢梁遣韓
勅將兵萬人屯澗口而荆南成汭亦悉衆救洪神福逆
戰敗之汭溺死勅走洪困甚會田頔安仁義俱叛行密
召神福存還洪復振天祐二年乃復遣神福劉存等攻
鄂州焚其城執洪斬于廣陵初行密遣冷業攻馬殷業
屯平江為三壁楚將許德勲等襲破之被擒至是復
使聶彥章等率舟師攻岳州彥章又被執軍士溺死者

萬餘人

按神福為鄂岳招討使鄂州屬杜洪岳州屬馬殷歐史全略攻岳之事今據新唐書補輯

冬

十一月行密卒諡武忠追尊為太祖武皇帝

渥字承天行密長子行密病出渥為宣州觀察使右衙指揮使徐溫私謂曰今王有疾而出嫡嗣必有姦臣之謀他日相召非溫使者慎無應命渥泣謝而去行密病甚命判官周隱作符召渥隱慮渥幼弱不任事薦大將劉威代主軍政行密未許會溫與嚴可求入問疾行密以隱議告之溫等大驚遽詣隱所隱未出見召符在案

急取遣之渥見溫使者乃行及嗣立遂殺周隱以王茂章為宣州觀察使渥之入也命取宣州庫物以歸茂章不與渥怒命李簡以兵五千圍之茂章以宣歙二州叛附於越天祐三年劉存取岳州江西鍾傳卒子匡時代立傳養子延規以兵攻匡時渥遣秦裴率兵攻之克洪州執匡時以歸赦之以秦裴為江西制置使梁太祖代唐改元開平渥仍稱天祐鄂州劉存岳州陳知新以舟師伐楚敗於瀏陽楚人執存及知新以歸不屈俱見殺

岳州復入于楚初渥之入廣陵也留帳下兵三千于宣
州以其腹心陳璠范遇將之既入立惡徐溫與牙兵名
璠等為東院馬軍以自衛而溫與左衛都指揮使張顥
皆行密時舊將又以立渥功惡璠等侵其權及渥視事
璠等侍側溫顥擁牙兵入拽璠等下斬之

按通鑑及十
國紀年載溫

顥忌朱思勅范遇陳璠等侵其權令從秦裴擊江西誣
以謀叛遣別將陳祐誅璠等于洪州溫顥率牙兵入朝
以鐵撻擊殺左右親信十餘人號曰兵諫
據此則璠等乃死于洪州也與歐史異

渥不能止由

是失政而心憤甚溫等益不自安遂遣盜入寢中弑渥

渥見羣盜許以能反殺溫等者為刺史羣盜皆諾惟紀祥不從執渥縊殺之諡曰景追尊為烈宗景皇帝

隆演字鴻源行密次子初名瀛又名渭當溫顯之弑渥也約分其地以臣于梁及渥死顯欲背約自立溫患之問其客嚴可求可求曰顯剛愎而闇于成事此易為也明日顯列劍戟府中召諸將議事自大將朱瑾而下皆去衛從然後入顯問諸將誰當立者諸將莫敢對顯三問可求前密啟曰方今四境多虞非公主之不可然在

今日如劉威陶雅李簡李遇輩未能降心事公不若立
幼主輔之為便顯不能對可求因趨出書一教內袖中
率諸將入賀出教宣之乃渥母史氏教言嗣王不幸隆
演以次當立告諸將無負楊氏而善事之辭旨激切顯
氣色皆沮隆演遂得立顯由此與溫有隙諷隆演出溫
潤州可求復以計留溫行軍副使李承嗣與顯善覺可
求有附溫意諷顯使客夜刺殺之不能中可求遂詣溫
謀先殺顯陰遣鍾章選壯士三十人就衙堂斬顯因盡

殺紀祥等以弑渥之罪歸之溫由是專政時撫州危全
諷袁州彭彥章吉州彭玕信州危仔倡皆起兵叛可求
薦周本使將兵七千敗之於象牙潭執全諷彥章而玕
奔楚仔倡奔錢塘全諷至廣陵以攻宣州時曾有功釋
之天祐八年徐溫領昇州刺史治舟師於金陵宣州李
遇自行密時為大將憤溫用事嘗曰徐溫何人而驟至
此溫聞之怒遣柴再用以兵送王壇代遇且召之遇不
受命再用圍之隆演使客將何蕘諭遇使自歸遇本無

反心乃隨羗出溫諷再用伺其出殺之族其家九年溫
率將吏進隆演位太師中書令吳王溫為行軍司馬鎮
海軍節度使同平章事陳章攻楚取岳州執其刺史苑玢
十年遣招討使李濤攻越裨將曹筠奔於越濤戰敗
被執越人攻常州徐溫敗之於無錫梁遣王茂章攻壽
春溫敗之於霍邱十二年以昇潤宣常池黃六州為齊
國封溫齊國公兩浙都招討使始鎮潤州留其子知訓
為行軍副使秉政而大事遙決於溫十三年宿衛將李

球馬謙劫隆演登樓發庫兵以討知訓知訓與戰頻却
諸道副都統朱瑾自潤州至視其陳曰此不足為也返
顧一麾外兵爭進亂兵潰遂擒球謙斬之溫徙治金陵
十五年遣王祺會洪表信三州兵攻虔韶久之不克祺
病以劉信代之克虔州執譚全播以歸副都統朱瑾殺
徐知訓瑾亦自殺潤州徐知誥聞亂率兵入殺唐宣諭
使李儼以止亂遂秉政徐氏之專政也隆演幼懦不能
自持而知訓尤凌侮之嘗飲酒樓上命優人高貴卿侍

酒知訓為參軍隆演鵠衣髻髻為蒼鵠知訓嘗使酒罵
生語侵隆演隆演懼而泣知訓愈辱之左右扶隆演起
去知訓殺吏一人乃止吳人皆仄目十六年春溫率將
吏請隆演即天子位不許夏四月溫奉玉冊寶綬尊隆
演即吳王位建宗廟社稷設百官如天子制改天祐十
六年為武義元年大赦境內追尊行密孝武王廟號太
祖溫景王廟號烈祖拜溫大丞相都督中外諸軍事封
東海郡王以徐知誥為左僕射參知政事嚴可求為門

下侍郎駱知祥為中書侍郎殷文圭沈顏為翰林學士
盧擇為吏部尚書李宗陳璋為左右雄武統軍柴再用
錢鏐為左右龍武統軍王令謀為內樞密使江西劉信
征南大將軍鄂州李簡鎮西大將軍撫州李德誠平南
大將軍廬州張宗安西大將軍海州王綰鎮東大將軍
文武以次進位封宗室皆郡公初溫徙鎮金陵以養子
知誥守潤州嚴可求嘗說溫去之溫不用其言及知誥
秉政前語頗泄知誥乃出可求於楚州可求懼因詣金

陵說溫宜及此時先建國以自立溫深然之因留可求
不遣方謀迫隆演僭號而隆演病卒隆演嗣位權在徐
氏及建國稱制非其本意常酣飲稀復進食遂卒諡曰
宣追尊為高祖宣皇帝

溥行密第四子隆演建國封丹陽郡公

五國故事
作丹陽王隆演

卒弟廬江公濛次當立而徐氏秉政不欲長君乃立溥
改昇州大都督府為金陵府拜徐溫金陵尹明年二月
改元順義赦境內冬祀天於南郊御天興樓大赦拜

徐溫太師嚴可求右僕射三年唐莊宗滅梁遣司農卿
盧蘋使於唐四年溥至白沙閱舟師徐溫來見以白沙
為迎鑒鎮六年追爵大丞相徐溫四代祖考立廟於金
陵左僕射徐知誥為侍中右僕射嚴可求同平章事是
歲莊宗崩詔為同光主輟朝七日七年大丞相徐溫率
吳文武上表勸溥即皇帝位溥未許而溫卒十一月溥
御文明殿即皇帝位改元曰乾貞大赦境內追尊行密
渥隆演皆為皇帝以知誥為太尉兼侍中拜溫子知詢

輔國大將軍金陵尹治溫舊鎮諸子皆封王二年荆南
高季興來附封秦王季興敗楚師于白田獲其將吏三
十四人來獻三年金陵尹徐知詢來朝知誥誣其有反
狀留不遣以為左統軍以徐知諤為金陵尹是歲改元
太和大赦以知誥為中書令二年冊其子江都王璉為
太子三年以知誥為金陵尹以其子景通為司徒及左
僕射王令謀右僕射宋齊丘皆平章事四年封知誥東
海王五年建都金陵六年金陵火罷建都廢臨川王濛

為歷陽公拜王令謀司徒宋齊丘司空知誥召景通還金陵為鎮海軍節度副使以其子景遷為太保平章事與令謀等執政七年九月大赦改元天祚知誥進位太師天下兵馬大元帥封齊王以昇潤宣池歙常江饒信海十州為齊國二年景遷病以次子景遂為門下侍郎參政事三年知誥建國以金陵為西都廣陵為東都冬十月溥遣江夏王璘奉冊禪位於齊王十二月溥卒於丹陽

按朱子綱目書故吳主楊溥卒通鑑云吳讓王卒十國紀年乃云營室於茆山遷溥居之及將遇弑溥方

誦佛書於樓上使者前趨溥以香爐擲之俄而見害紀
年所云或不足據而薛史唐餘錄皆云溥禪位踰年幽
卒李昇載記亦云天祚三年十月受禪改元昇元至昇
元二年始遷溥於丹陽宮十一月卒此云天祚三年十
月受禪十二月溥卒諡曰睿昇元六年李昇遷其子孫
前後互異未詳孰是

於海陵號永寧宮嚴兵守之絕不通人久而男女自為

匹偶吳人多哀憐之周顯德二年世宗征淮南下詔撫

楊氏子孫李景聞之遣人盡殺其族楊氏遂絕

徐無黨曰據吳

錄運歷圖九國志皆云行密以唐景福元年再入揚州
至晉天福二年為李昇所篡實四十六年而舊唐書舊
五代史皆云大順二年入揚州至被篡四十七年吳錄
徐鉉等撰運歷圖龔穎撰二人皆江南故臣所記宜得

實而唐未喪亂中朝文字多差失故今以鉉穎所記為定
按五代史吳世家此下有徐溫附傳溫聞南唐之先偽尊為帝其事跡已詳載記今從刪

田頌字德臣與楊行密同里約為兄弟初應州募屯邊
遷主將行密起事頌與劉威陶雅之徒號三十六英雄
文德元年攻宣州刺史趙錙出東溪乘暴流以逸頌以
輕舫追之遂擒錙行密表頌為馬步軍都虞候沙陀叛
將安仁義奔淮南行密大喜屬以騎兵使在頌右兩人
名冠軍中共攻常州殺刺史杜稜孫儒略地南來頌等

屯丹陽儒焚廣陵壁廣德顥破其屯與戰顥走行密怒
欲奪其兵或諫之乃止儒遺仁義書願通好以間行密
行密待之益厚署為行軍副使卒以二人功擒儒乃表
顥為寧國軍節度使累遷檢校太保同平章事仁義潤
州刺史加檢校太保天復二年顥平馮弘鐸至揚州謝
行密左右多求賂而獄吏亦有請顥怒曰吏覬吾入獄
邪又求池歛為屬州行密不許由是始怨將還指府門
曰吾不復入此矣是時錢鏐部將許再思徐綰叛圍鏐

屯兵靈隱山迎顧攻杭州顧攻北門鏐登城與語射中
麾下并築壘絕往來道鏐患之乃出金幣募能破壘者
陳章以死士三百免胄馳擊奪其道顧圍之益急先是
行密常欲以女妻鏐子鏐乃遣元臻如淮求昏且告難
行密使人召顧曰不還當遣人代守宣州鏐又輸錢二
百萬緡犒軍出其子元瓘為質顧乃引兵還然以此益
怨行密遂大募兵陰與梁通好李神福決其必反數請
行密圖之行密曰顧有大功而反狀未明殺之恐諸將

不為用時康儒在顧所乃授儒盧州刺史以間之顧怒
族儒家遂反與安仁義連和攻昇州劫刺史李神福妻
子時神福方攻鄂州行密亟召還攻顧顧遣李臯遺以
書曰公家屬在此苟從我當分地以王神福答曰吾以
一卒從吳王任上將肯背德而顧妻子耶立斬臯以示
絕顧將王璠以舟師躡神福後欲掩襲之半濟神福反
兵順流逆擊大破之因縱火士多焚溺死明日復敗之
於皖口顧乃自將出戰神福瀕水而屯堅壁不動請行

密以兵塞其走道仁義焚東塘戰艦夜攻常州不克轉戰至夾岡植二幟解甲而食追兵疑其有伏莫敢迫仁義遂入潤州行密遣王茂章圍之仁義素以善射冠軍中又其治軍嚴而有恩善得士心以故茂章等不敢與角行密遣使招諭使自歸仁義欲降其子固沮之而止顧自為神福所困已還蕪湖留精兵二萬以屬郭行琮至是行密復遣臺濛擊之濛為營頗狹小覘者以為才容二千人顧輕之不復益兵與戰黃池濛陽敗走顧兵

爭逐之遇伏遂大敗名蕪湖兵不得入乃率敢死士數
百號爪牙都以薄濛濛殊死戰顧軍潰乃奔為亂兵所
殺傳首至淮南行密泣下葬以庶人禮而還元瓘於越
時仁義欲降未決茂章乘其怠穴地道而入仁義父子
俱就縛斬於揚州市顧為人寬厚善遇士當時若楊夔
康駢夏侯淑殷文圭王希羽等皆為上客文圭有美名
梁與吳越交辟不應顧置田宅迎其母事之甚恭故文
圭為盡力夔知顧不足以亢行密著溺賦以規顧不能

用遂及禍濛字頂雲亦合淝人顯破行密表為檢校太保宣州觀察使

朱延壽廬州舒城人行密妻朱夫人弟也少事行密頗立戰功行密欲以寬厚結人心而延壽敢殺嘗捕得盜行密輒賜所盜物遣之且戒曰勿使延壽知而陰許延壽誅之高彥溫以壽州入梁行密襲其域不克延壽拔之梁兵解去遂取黃蘄光三州以功累遷壽州團練使唐昭宗在鳳翔詔行密討梁拜延壽奉國軍節度使以

圍蔡梁兵每至延壽開門不設備而不敢逼其用軍好
以寡鬪衆敗還者盡斬之田頔私結好於梁延壽陰約
曰公有所為我願執鞭願喜二人謀絕行密行密憂甚乃
陽為目疾每接延壽使者必錯亂其所見以示之嘗行
故觸柱而仆朱夫人扶之良久乃蘇泣曰吾業成而喪
明諸子幼不足以任大事得舅代我無憂矣夫人喜急
召延壽延壽至行密迎之寢門刺殺之朱夫人亦被出

按田頔朱延壽皆行密部將事蹟多繁
行密應附入吳載記今據新唐書補輯

欽定續通志卷五百九十四

欽定四庫全書

欽定續通志卷五百九十五

載記二

南唐

李昇

景

煜

附孫晟

劉仁瞻

韓熙載

徐鉉

鑑
周惟簡

潘佑

李平

皇甫繼勳

李昇

宋史
作昇

字正倫徐州人少孤流寓濠泗間楊行密攻

濠州得之奇其貌養以為子而楊氏諸子不能容行密以乞徐溫乃冒姓徐氏名知誥為吳樓船軍使以舟兵屯金陵柴再用攻宣州用其兵殺李遇以功拜昇州刺史徐溫以齊國公就鎮潤州昇池等六州皆其屬聞昇有善政往視之見府庫充實城壁修整乃徙治之而遷昇於潤昇初不欲往屢求宣州溫不與既而徐知訓為朱瑾所殺昇居潤州近廣陵得先聞即日以州兵渡江定亂遂得政昇事徐溫甚孝謹溫諸子皆忌之知訓尤

甚嘗召飲伏劍士欲害之賴刁彥能護解以免後昇貴
以彥能為撫州節度使昇秉政後欲收人心乃寬刑法
推恩信延四方之士引宋齊丘駱知祥王令謀等為謀
客民有婚喪匱乏往往賙給之以故溫雖遙秉大政而
吳人頗已歸昇武義元年拜左僕射參知政事溫行軍
司馬徐玠數勸溫以己子代昇溫遣子知詢入廣陵謀
代會溫病卒知詢奔還金陵玠反為昇謀誣知詢以罪
斬其客將周廷望以知詢為左統軍楊溥僭號拜昇太

尉中書令太和三年出鎮金陵如溫故事四年封東海
郡王昇照鑑見白鬚顧其吏周宗歎曰功業已就而吾
老矣奈何宗知其意馳詣廣陵見宋齊丘謀禪代齊丘
不可請斬宗以謝吳人乃黜宗為池州刺史吳臨江王
濛以次當立怨徐氏捨已立溥心常不平及昇將謀篡
國先廢濛為歷陽公使其親信王宏以兵守之濛殺守
者奔廬州節度使周本吳舊將也聞濛至遽自出迎其
子祚閉門遮本不得出縛濛至金陵遂見殺五年昇封

齊王已而閩越諸國皆遣使勸進昇謂人望已歸天祚

三年建齊國置宗廟社稷以宋齊丘徐玠為左右丞相

十月溥遣攝太尉楊璘傳位於昇國號齊

按通鑑以是年即號唐國

馬今陸游南唐書皆云先號齊與歐史同改元昇元冊尊溥為高尚思玄弘

古讓皇帝追尊徐溫為忠武皇帝封子景通為吳王

景

初名景通既立改名環及奉表稱臣於周始改名景蓋以周太祖高祖諱環故避之也則環未立時應書景通

保大十三年以前應書環而各本俱作景稱臣之後封應書景而各本反作環今據周本紀改正後倣此封

徐知證江王知諤饒王周本與諸將至金陵勸進歸而

歎曰吾不能誅篡國者以報楊氏今老矣豈能事二姓乎憤惋而死二年遷楊溥於潤州丹陽宮以王興為浙西節度使馬思讓為丹陽宮使以嚴兵守之徐氏諸子請昇復姓昇謙抑不敢忘徐氏恩下百官議百官皆請乃復姓李氏改名昇自言唐憲宗子建王恪四世孫改國號曰唐立唐高祖太宗廟追尊高祖恪為孝靜皇帝廟號定宗曾祖超為孝平皇帝廟號成宗祖志孝安皇帝廟號惠宗考榮孝德皇帝廟號慶宗奉徐溫為義祖

徐氏子孫皆封王公女封郡縣主以門下侍郎張居詠
中書侍郎李建勲右僕射張延翰同平章事十一月楊
溥卒溥子璉為吳太子時昇以女妻之及篡國封其女
為永興公主女聞人呼公主必涕泣而辭宮中皆憐之
溥卒以璉為康化軍節度使未幾亦卒三年四月昇郊
祀昊天上帝於圓丘羣臣請上尊號不許四年晉安州
節度使李金全叛送款於昇昇遣鄂州屯營使李承裕
迎之承裕與晉將馬全節安審暉戰安陸南三戰皆敗

及裨將段處恭死之都監杜光鄴及其兵五百人被執
六年吳越國火焚其宮室府庫甲兵殆盡羣臣請乘其
弊攻之昇不許遣使弔問厚賙其乏錢氏自吳時素為
敵國昇見天下久亂常厭用兵志在守吳舊地及將篡
國先與錢氏約和歸所執將士錢氏亦歸吳敗將遂通
好不絕吳人亦賴以休息七年昇卒謚曰光文肅武孝
高皇帝廟號烈祖

景初名景通昇長子既立改名璟徐溫死昇秉政以為

兵部尚書參知政事明年昇鎮金陵留璟輔政昇將纂
國召歸為中外諸軍副都統昇受禪封齊王及嗣位改
元保大尊母宋氏為皇太后冊妃鍾氏為皇后封弟景
遂為燕王景達為鄂王景邁為保寧王秋改封景遂齊
王諸道兵馬元帥太尉中書令景達為燕王副元帥盟
於昇柩前約兄弟世世繼立封其子冀南昌王江都尹
冬破虔州妖賊張遇賢遇賢自循州作亂自號中天八
國王過嶺取虔州遂襲南康節度使賈浩不能禦遇賢

據白雲洞造宮室有衆十餘萬連陷諸州縣璟命洪州營屯虞侯嚴思通事舍人邊鎬率兵攻之羣盜執遇賢以降璟以馮延巳常夢錫為翰林學士馮延魯為中書舍人陳覺為樞密使魏岑查文徽為副使夢錫直宣政殿專掌密命而延巳等皆以邪佞用事吳人謂之五鬼夢錫屢言延巳等不可用璟不納下令中外庶政委齊王景遂參決惟陳覺查文徽得奏事羣臣非召見不得入給事中蕭儼上疏切諫不報侍衛軍都虞侯賈崇入

諫辭意激切環為之動容遂寢所下令初昇纂楊氏宋
齊丘最有力及成事陽入九華山昇屢招之乃出尋以
病罷相出為洪州節度使環立復召為相陳覺魏岑等
皆齊丘所引用而岑與覺有隙譖覺於環左遷少府監
齊丘亦罷相為浙西節度使齊丘不得志願復歸九華
山許之二年閩人連重遇朱文進弑其主王延曦文進
自立時延曦弟延政亦自立於建州國號殷連兵累年
環因其亂遣查文徽等發兵攻建州延政聞唐兵且至

遣人給福州曰唐兵助我討賊矣福人信之殺文進等
以降延政遣從子繼昌守福州文徽軍屯建陽福州將
李仁達殺繼昌自稱留後泉州將留從効亦殺其刺史
黃紹頗皆送款文徽文徽克建汀泉漳四州璟分延平
劍浦富沙三縣置劍州遷王延政之族於金陵以延政
為饒州節度使仁達為福州節度使從効為清源軍節
度使遂議罷兵而查文徽陳覺等皆言仁達等餘孽猶
在不若乘勝盡取之覺又自言可不用尺兵致仁達等

乃以為宣諭使召仁達朝金陵仁達不從覺輒還至建
州矯命發汀建信撫州兵攻仁達時魏岑安撫漳泉聞
覺起兵亦擅發兵會覺璟大怒馮延巳等為言兵業行
不可止乃以王崇文為招討使王建封為副使益兵會
之馮延魯魏岑陳覺皆為監軍使仁達送款吳越吳越
以兵三萬應之覺等爭功進退不相應延魯與吳越兵
戰先敗走諸軍皆潰歸璟怒遣使者銷覺延魯至金陵
而馮延巳方為宰相宋齊丘復自九華召為太傅為稍

解之乃流覺蘄州延魯舒州韓熙載上書請誅覺等齊
丘惡之貶和州司馬御史中丞江文蔚亦劾馮延巳魏
岑亂政與覺等同罪言甚切直璟大怒貶江州司士參
軍亦罷延巳為少傅岑為太子洗馬五年以景遂為太
弟景達為元帥封齊王南昌王冀為副元帥封燕王契

丹滅晉遣使來聘以兵部尚書賈潭報聘

按龍象江南野史作命兵

部尚書賈談馬今南唐書作
兵部侍郎賈潭與跋火互異

六年漢李守貞反河中遣

其客將朱元來求援以潤州節度使李金全為北面行

營招撫使兵至沭陽聞守貞已敗乃還時漢隱帝少中國衰弱淮北羣盜多送款於璟璟遣皇甫暉出海泗諸州招納之八年福州詐言吳越戍兵亂殺李仁達而遜遣人請建州節度使查文徽文徽與劔州刺史陳誨趨應之福州以兵出迎文徽進至西門伏兵發被擒誨與越人戰大敗之獲其將馬先進璟送先進還越越亦歸文徽是歲楚馬希萼弑其主希廣自立楚人囚希萼立其弟希崇來附璟遣信州刺史邊鎬攻楚破之事具楚

載記以鎬為湖南節度使十年分洪州高安清江萬載
上高四縣置筠州以馮延巳孫忌為左右僕射同平章事
廣州劉晟乘楚亂取桂管遣將軍張巒出兵爭之不克
楚地新定其府庫空虛馮延巳重斂其民以給軍楚人
皆叛其將劉言攻邊鎬鎬不能守遯歸十三年周世宗
南征拜李穀為行營都部署攻淮南自壽州始時齊丘
為洪州節度使召還金陵以劉彥貞為神武統軍劉仁
贍為清淮軍節度使

按馬令陞淮南唐書及唐餘紀保
大十三年四月以劉彥貞為神

武統軍以劉仁贍為清淮軍節度使冬十一月周師南
征乃以神武統軍劉彥貞為北面行營都部署赴壽州
奉化節度使皇甫暉常州團練使姚鳳毛定遠通鑑亦
載以神武統軍劉彥貞為北面行營招討使均非同師
攻淮南時始以彥貞為神武統軍以拒周師李穀退屯
仁贍為清淮節度使也與歐史異

正陽時世宗親征至圍鎮聞穀退軍曰吾軍却唐兵必
追遣李重進趨擊之劉彥貞等聞穀退追及正陽而重
進已先至軍未及食而戰彥貞等遂敗世宗營淝水之
陽徙浮橋于下蔡璟遣林仁肇等爭之不得皇甫暉姚
鳳以兵十五萬守清流關周師破之取滁州暉鳳被擒

環懼遣泗州牙將王知朗至徐州稱唐皇帝奉書願効
貢賦陳兄事之禮世宗不答東都副留守馮延魯光州
刺史張紹舒州刺史周祚泰州刺史方訥皆棄城走延
魯為周兵所獲蘄州裨將李福殺刺史王承雋降周環
益懼始改名景以避周廟諱遣翰林學士鍾謨文理院
學士李德明奉表稱臣以牛酒金幣犒軍請割壽濠泗
楚光海六州以求罷兵世宗不報分兵襲下揚泰光州
刺史張承翰降周十四年又遣司空孫晟等奉表辭益

卑服世宗猶不答前遣鍾謨及晟等皆留行在乃請歸
取景表盡獻江北地世宗許之賜景書許仍存帝號德
明等還盛稱世宗英武景不悅宋齊丘等皆以割地無
益德明賣國圖利遂斬德明遣齊王景達與陳覺邊鎬
許文鎮率兵趨壽春景達將朱元等復得舒蘄泰三州
夏大雨周師在楊滁和者皆却諸將請要擊宋齊丘曰
擊之怨深不如縱之誠閉壁勿出故周師皆集壽州世
宗班師以李重進攻廬壽向訓守揚州訓請棄揚州併

力攻壽春乃封府庫付主者城中秋毫無犯淮人大悅
皆負糗糧以送周師十五年景達遣朱元等屯紫金山
築甬道餉壽州世宗復南征徙下蔡浮橋於渦口為鎮
淮軍築二城以夾淮連破紫金諸寨景達雖為元帥而
兵事決於陳覺覺與朱元有隙因表元反覆難信景以
楊守忠代之且召元元憤怒叛降周諸軍皆潰許文鎮
邊鎬皆被執景達奔還金陵劉仁膳病革副使孫羽等
以壽州降周世宗班師至十月又親征遂圍濠州刺史

郭廷謂降又取泗州周師步騎數萬水陸齊進軍士作

檀來之歌聲聞數十里屯楚州北門次年正月改元中

興大赦三月又改元交泰

按陸游南唐書十國春秋俱云正月先改元中興三月改

元交泰唐餘紀亦云改元交泰在三月惟湯悅江南錄作正月即改元交泰歐史蓋沿其誤今改正

周師

攻楚州城破守將張彥卿鄭昭業戰死屠其城海泰揚

三州復入於周世宗幸迎鑾鎮耀兵江口景懼其南渡

乃遣陳覺奉表請傳國於世子以聽命

馬令南唐書作遣鍾謨等請傳

位初周師南征無水戰具已而屢敗景兵獲水戰卒乃

造戰艦數百艘使降卒教之命王環將以下淮景水軍
多敗長淮之舟皆為周師所得又造齊雲船數百艘世
宗至楚州北神堰舟大不能過乃開老鵲河以通之遂
至大江覺奉使見舟師甚盛以為自天而下乃請還國
取景表盡獻江北諸州世宗許之賜景書曰皇帝恭問
江南國主時楊泰滁和壽濠泗楚光海等州已為周得
景遂獻廬舒蘄黃畫江為界五月景下令去帝號稱國
主奉周正朔稱顯德五年

按唐餘紀云聘獻于周用顯
德年號在本國則仍舊稱通

鑑云奉其正初孫晟使於周留不遣世宗問以江南虛
朔與歐史同

實不對殺之及周罷兵景乃贈劉仁膽太師封衛王追
封晟魯國公世宗遣鍾謨馮延魯歸國景復遣謨等朝
京師手自書表稱天地父母之恩不可報又請降詔書
同藩鎮遣謨面陳願傳位世子世宗遣還國優詔以勞
安之景以謨為禮部侍郎延魯戶部侍郎謨素善李德
明既歸聞德明由宋齊丘等見殺欲報其冤未能發陳
覺齊丘黨也與嚴續素有隙覺嘗使周還言世宗以江

南不即聽命者嚴續之謀勸景誅續以謝罪景疑之謨
因請使於周驗其事謨入朝察且妄還言覺姦詐景怒
流覺饒州殺之宋齊丘生覺黨放還青陽賜死以景遂
為洪州節度使燕王冀為太子顯德六年冀卒次子從
嘉封吳王旋立為太子宋建隆元年太祖即位以書諭
景遣還周顯德中江南降將周成等三十四人景亦遣
使賀登極自是貢獻不絕初景之襲父位也屬中原多
故跨據江淮三十餘州擅魚鹽之利即山鑄錢物力富

盛及頻年用兵國寢空虛乃鑄用鐵錢宋太祖既下揚州日習馬舫戰艦於京城南池景聞之懼其臣杜著薛良並歸朝獻平南策太祖命斬著而配良廬州景終不自安乃謀遷都於洪州羣臣皆不欲惟樞密使唐鎬贊之遂升洪州為南昌建南都建隆二年留太子從嘉監國景遷於南都而洪州迫隘官府營廨皆不能容羣臣日夕思歸景悔怒不已六月卒從嘉嗣立以喪歸金陵遣使入朝願復景帝號宋太祖許之謚曰明道崇德文

宣孝皇帝廟號元宗

煜字重光初名從嘉景第六子性仁孝一目重瞳子自

太子冀已上五子皆早卒煜以次立為太子景卒嗣立

於金陵尊母鍾氏曰聖尊后

以鍾氏父名秦章故不稱太后

立妃周氏

為國后封弟從善韓王從益鄭王從謙宜春王從度昭

平郡公從信文陽郡公大赦境內遣中書侍郎馮延魚

奉表修貢建隆三年泉州留從効遣其子紹基來通好

宋史留從効傳作從子紹琪

紹基未返而從効卒泉人因并送其族

於金陵推立副使張漢思漢思老不任事州人陳洪進
逐之自稱留後煜拜為節度使乾德二年始用鐵錢民
間多藏匿舊錢錢益少商賈多以十鐵錢易一銅錢出
境官不能禁煜因下令以一當十九月封長子仲遇清
源公次子仲儀宣城公拜韓熙載中書侍郎煜襲位之
初命諸司四品以下無執事者日二員待制於內殿五
年令兩省侍郎給事中中書舍人集賢勤政殿學士更
直光政殿談論文學掌故之事是歲熙載卒加贈平章

事開寶四年煜遣其弟韓王從善朝京師留不遣煜手
疏求從善還國宋太祖不許煜嘗怏怏以威弱為憂會
嶺南平煜懼上表遂改稱江南國主請罷詔書不名許
之國中貶損制度下書稱教改中書門下省為左右內
史府尚書省為司會府御史臺為司憲府翰林為文館
樞密院為光政院諸王皆為國公以尊朝廷

按宋史載煜雖外示

畏服守藩臣之禮而內實繕甲募兵潛為戰備又云王師傳城募勇士五千餘人謀襲官軍皆素不習戰未免

矛盾今仍

煜驕侈好聲色又性喜浮圖日與羣臣酣宴

從政也

賦詩不恤政事內史舍人潘佑上書極諫下獄佑自縊
死時宋太祖既下嶺南方有志江表江都留守林仁肇
密啟煜曰淮南戍兵少願假數萬人自壽春徑渡復江
北舊境彼縱來援可據淮以禦之兵起日請以臣叛聞
於北朝事成國享其利敗則族臣家明陛下無二心煜
不聽太祖忌仁肇威名用間殺之七年秋遣使召煜赴
闕煜稱疾不奉詔乃以曹彬為西南路行營都部署潘
美為都監討之初太祖將伐江南進士樊若水詣闕獻

策請造浮梁以濟師太祖遣八作使郝守濬等率丁匠營之先試於石牌口移置采石三日而成渡江若履平地煜初聞朝廷將作浮梁笑以為兒戲其時主兵者率多新進踴躍陳利害鄭彥華杜真督水陸二萬人出禦皆為潘美所敗而煜方委兵柄於皇甫繼勳委機事於陳喬張洎軍書告急多不時通至八年春宋師傅城下召朱令贇於上江令連巨筏載甲士數萬人順流而下以斷浮梁未至為劉遇所破又募勇士謀為掩襲皆素

不習戰以暮夜秉炬攻北砦宋師縱其至殲焉煜危窮甚乃令徐鉉固求緩師不許八年冬金陵城破煜率近臣迎拜於門彬等執之并其宰相湯悅等四十五人獻俘闕下太祖御明德樓以煜嘗奉正朔止令白木紗帽待罪至樓下詔並釋之賜冠帶鞍馬器幣有差封違命侯其弟姪各授官賜宅太宗即位始去違命侯封隴西

邵公太平興國三年七月卒追封吳王

後無黨曰據湯悅所撰江南錄

云景以保大十五年改元交泰是歲盡獻淮南十四州
吳江為界保大十五年乃周顯德四年也按五代舊史

及世宗寶錄顯德四年十月壬申世宗方復南征五年正月丙午始克楚州二月己亥景始盡獻淮南諸州盡江為界當是保大十六年也悅等南唐故臣記其目見之事何其差謬而九國志紀年通譜之類但以悅書為正不復參較遂皆差一年至於景滅閩國是保大四年江南錄書於三年亦差一年已見閩世家注或疑景立踰年而改元則滅閩國當為三年周取淮南當為十五年不差但江南錄誤於景立之年改元保大所以當差一年也今知不然者以諸書參較閩人殺王延曦當晉開運元年周師始伐南唐當顯德二年據景以初立之年即改元則開運元年為保大二年顯德二年為保大十三年今江南錄書延曦被殺於二年周師始伐於十三年則是景立之年改元不誤而悅等書滅王氏割淮南自各差二年爾昇自晉天福二年建國至開寶八年國滅凡三十九年案宋史南唐世家此下有李從善從誦季操及舒元馮謐等附傳舒元即朱元馮謐即馮

延魯已附見載記餘
無事跡足錄俱從刪

孫晟初名鳳又名忌密州人初謁唐莊宗於鎮州為著作佐郎天成中朱守殷辟為判官守殷反伏誅晟奔于吳時李昇方纂楊氏招四方之士得晟喜其文辭使為教令引與計議多合意以為右僕射與馮延巳並為相晟事昇父子二十餘年官至司空家益驕侈食不設几案使衆妓各執一器環侍號肉臺盤時人多效之周世宗征淮李景奉表稱臣世宗不答乃遣禮部尚書王崇

質副晟奉表願割壽濠六州地歲貢百萬以佐軍世宗
欲盡取淮南留使者不遣而攻壽州益急前遣使鍾謨
等請還取景表盡獻江北諸州世宗許之遂遣崇質等
南還而謨與晟皆見留初晟之奉使也語崇質曰吾行
必不免然吾終不負永陵一杯土及崇質還而晟與鍾
謨俱至京師待之甚厚已而周兵數敗盡失所得諸州
世宗召晟問江南事晟不對會李重進上景所遺蠟丸
書勸重進反且多斥周過惡世宗怒收晟下獄殺之晟

臨死世宗猶遣近臣問之晟終不對正衣冠南望拜曰
臣惟以死報國爾景聞晟死贈魯國公

劉仁瞻字守惠彭城人父金事楊行密為濠滁二州刺
史仁瞻少通兵書事南唐為左監門衛將軍黃袁二州
刺史李景使掌親軍以為武昌軍節度使周師征淮景
命仁瞻鎮壽州時世宗攻圍壽州自正月至四月不能
下會大暑霖雨彌旬淮淝暴漲周兵多死世宗東趨濠
梁以李重進為廬壽州都招討使景亦遣齊王景達等

列砦紫金山下而重進與張永德兩軍不協仁贍屢請
出戰景達不許由是憤惋成疾明年正月世宗復至淮
上守將或走或降皆不能守仁贍獨堅守不可下仁贍
幼子崇諫幸其父病謀與諸將出降仁贍立命斬之於
是士卒皆感泣願以死守三月仁贍病甚已不知人其
副使孫羽詐為仁贍書以城降世宗命昇仁贍至帳前
嘆嗟久之復使入城養疾是日卒追封彭城郡王李景

聞仁贍卒亦贈太師

按孫嚴劉仁贍五代史列入死節傳嚴仕南唐為周世宗所留見投

仁聘守齊州至死不降事繁
南唐應列為附傳今補輯

韓熙載字叔言濰州北海人舉後唐同光中進士父光

嗣為平盧軍節度副使

按徐鉉作熙載墓銘云光嗣
官秘書少監淄青觀察支使同

光末青州軍亂遂其帥符習推光嗣為留後明宗誅光

嗣熙載奔吳及昇僭號為祕書郎令事其子景於東宮

景嗣位遷虞部員外郎史館修撰言事切直景深嘉納

之又改吉凶儀禮不如式者十數事為宋齊丘馮延巳

所忌昇將葬景以熙載知禮令兼太常博士時江左草

創典禮多闕議者以昇繼唐昭宗後廟號合稱宗熙載
建議以為中興之君當稱祖請號烈祖景由是益加恩
禮尋為宋齊丘所中貶和州司馬久之復召為中書舍
人世宗平淮甸景患國用不足熙載請鑄鐵錢及煜襲
位卒行之而錢貨益輕不勝其弊熙載善為文性高簡
無所卑屈生平未嘗拜人雖被黜逐終不改節江左號
為韓夫子顯德中朝京師歸景問中國大臣時宋太祖
方典禁兵熙載對曰趙點檢顧視非常不可測也及太

祖登極景益重之家畜妓妾甚衆不加防範與賓客生
徒雜處煜以其盡忠言事嘗欲相之以帷薄不修責授
右庶子分司南都已而復位遷中書侍郎開寶三年卒
徐鉉字鼎臣揚州廣陵人十歲能屬文與韓熙載齊名
江東謂之韓徐初仕吳為校書郎又事李昇父子試知
制誥與宋齊丘素不協時有得軍中書檄者鉉及弟錯
評其援引不當機乃湯悅所作悅因與齊丘誣鉉兄弟
洩機事鉉坐貶泰州司戶掾錯為江尉俄復舊官時景

遣內臣車延規傳宏營屯田於楚州處事苛細人不堪
命乃使傅乘傳巡撫鉉至楚奏罷屯田延規等懼逃罪
鉉捕之急權近側目及捕得賊首不俟報即斬之坐專
殺流舒州已而召還拜太子右諭德復知制誥遷中書
舍人景卒事煜為禮部侍郎歷遷吏部尚書宋師圍金
陵煜遣鉉求緩兵時朱令贇將兵十餘萬自上江來援
煜以方求和解而復決戰恐不利於使者欲止令贇勿
東下鉉不可曰要以社稷為計豈顧一介之使乎煜泣

而遣之及至說雖不行而入見辭歸禮遇頗異後隨煜
歸朝太祖責之聲甚厲鉉對曰臣為江南大臣國亡罪
當死不當問其他太祖歎曰忠臣也命為太子率更令
太平興國初李昉獨直翰林鉉直學士院從征太原軍
中書詔填委鉉援筆無滯辭理精當師還加給事中歷
左散騎常侍與湯悅同撰江南錄至於亡國之際不言
其過但歸之歷數識者韙之淳化二年以誣告姦私事
貶靜難行軍司馬至邠州卒弟錯字楚金四歲而孤母

方教鉉未暇及錯能自知書稍長文辭與鉉齊名授祕書省正字累官內史舍人凡四知貢舉號得人以鉉奉使入宋憂卒鉉精篆隸錯亦工小學兄弟著述甚富頌傳於世又有周惟簡者曾以虞部郎中致仕張洎薦其有遠畧召為給事中副鉉而行至京師宋太祖召見詰責之惟簡惶恐反言曰臣本居山野無仕進意李煜強臣來耳事寧後願得賜終南山樓隱及江南平宋以為國子周易博士判監事俄上書述前志求解官蓋非其

本心也太平興國中上表自求用乃除水部員外郎卒

按徐鉉宋史列入文苑傳鉉在南唐官至吏部尚書事蹟多繫南唐應列為附傳今補輯

潘佑散騎常侍處常子工文辭韓熙載徐鉉共薦於景
為祕書省正字遷內史舍人有李平者本嵩山道士楊
訥依河中帥李守貞守貞反遣訥與朱元乞師江南守
貞敗遂易姓名留江南歷官戶部侍郎平好神仙修煉
之事動作妖妄佑與平相善嘗建議復井田及依周禮
置牛籍薦平判司農寺以督之事行百姓大擾未幾罷

佑又言國將亡非已為相不可救政事多在尚書省因薦平知省事並請誅宰相湯悅等數十人煜手詔戒之遂自殺

皇甫繼勲江州節度使暉之子幼以蔭補軍校累遷神衛統軍都指揮使時諸老將相次皆死繼勲年雖少遂為大將及宋師至諸軍多敗繼勲欲煜速降每衆中流言頗道國中微弱且密陳天變以為滅亡之兆偏裨有欲募勇士以邀宋師者輒鞭而拘之以故士莫能用

命會煜躬自巡城見宋列師柵城外知為左右所蔽乃
數其惑衆棄命之罪收付大理軍士齧割其肉頃刻而
盡

欽定續通志卷五百九十五

欽定四庫全書

欽定續通志卷五百九十六

載記

三

前蜀

王建 衍

附 王宗滌 王宗弼

王建字光圖許州舞陽人少無賴以屠牛盜驢販私鹽為事後為忠武軍卒稍遷隊將黃巢陷長安僖宗在蜀

忠武軍將鹿宴弘以兵八千屬楊復光討賊巢敗走復
光以其兵為八都建與晏弘皆為一都頭復光死晏弘
率兵西入蜀行至興元逐節度使牛勣自稱留後僖宗
即拜為節度使晏弘以建等領屬州刺史已而晏弘擁
衆東歸陷陳許建與晉暉韓建張造李師泰等各率一
都奔蜀僖宗得之大喜號隨駕五都以屬十軍觀軍容
使田令孜令孜以建等為養子僖宗還長安令孜與河
中王重榮爭鹽池重榮召晉兵犯京師僖宗幸鳳翔

移幸興元令孜懼得罪因求為西州監軍楊復恭代為

軍容使復恭斥令孜黨出建為壁州刺史

按通鑑作利州刺史下云

建又攻利州刺史王珙棄城走則建非為利州刺史也今仍從歐史建乃招集亡命及溪

洞部落有衆八千以攻閬州執刺史楊行遷又攻利州

刺史王珙棄城走西川節度使陳敬瑄患之以問令孜

令孜曰旺布吾兒也召之可置麾下乃使人招建建大

喜選精兵二千馳之成都行至鹿頭關敬瑄悔使人止

之建大怒擊破鹿頭關取漢州東川顧彥朗與建有舊

出兵助建軍于學射敬瑄遣將句惟立逆建建擊敗之
遂攻彭州敬瑄遣眉州刺史山行章將兵五萬屯新繁
建又擊敗之俘戮無算敬瑄發兵七萬益行章與建相
持濠陽新都百餘日昭宗遣左諫議大夫李珣為兩川
宣諭和協使詔彥朗等罷兵彥朗請以大臣鎮蜀因為
建求旌節文德元年以宰相韋昭度為西川節度使分
邛蜀黎雅為永平軍拜建節度使敬瑄不受代昭宗即
命昭度將彥朗等兵討之以建為招討牙內都指揮使

通鑑作以建充行營諸軍都指揮使久之不克建謂昭度曰公以數萬衆

困兩川之人師久無功且唐室多故東方諸鎮兵接都

畿公當歸相天子靜中原以固根本此蕞爾之區不足

以留公昭度遲疑未決建遣軍士擒昭度親吏於軍門

嚮而食之入白曰軍士饑須此為食爾昭度大恐即留

符節與建而東昭度去建即以兵扼劔門兩川由是阻

絕又擊敗山行章於廣都行章以眉州降資簡戎茂嘉

邛諸州皆殺刺史降按新唐書昭宗本紀眉州叛乃龍紀元年事嘉簡諸州俱於大順元

年降建尚有雅州將謝從木
蜀州刺史李行周同時叛附建攻成都急令孜危窘甚

乃夜入建軍以節度觀察牌印授建明日敬瑄開門迎
建建以張勅為都虞候戒軍士無剽掠建入城還敬瑄
于雅州使人殺之復以令孜為監軍尋亦殺之大順二
年十月唐以建為檢校司徒成都尹劍南西川節度副
大使知節度事管內觀察處置雲南八國招撫等使東
川顧彥朗卒弟彥暉立唐遣宦者宗道弼賜彥暉東川
旌節緜州刺史常厚執道弼以攻梓州自彥朗死建欲

圖并東川而未有以發乃遣李簡王宗滌等討厚戒之
曰兵破厚彥暉必出犒師既與俱來無煩吾再舉也簡
敗厚于鍾陽厚走還縣州以唐旌節還道弼而出之彥
暉已得節辭疾不出犒軍乾寧二年建遣王宗滌攻之
宗滌敗彥暉于楸林斬其將羅璋遂圍梓州三年昭宗
遣宦者袁易簡詔建罷兵乃還成都黔南節度使王肇
通鑑作武泰軍以其地降建四年宗滌復攻東川別遣
節度使王建肇王宗侃等取渝瀘州五月建自將攻東川昭宗遣諫議

大夫李洵

按前云昭宗遣左諫議大夫李珣為兩川宣諭使此云遣諫議大夫李洵恐係一人為珣

與洵之訛但通鑑此處亦作李洵與歐史同今仍原文

判官韋莊宣諭兩川詔建

罷兵建不奉詔乃責授建南州刺史以李茂貞代建茂

貞拒命乃復建官爵十月建攻破梓州彥暉自殺建以

王宗滌為東川留後唐即拜為節度使于是并有兩川

地時鳳翔李茂貞兼據梁洋秦隴數侵建天復元年宦

者韓全誨等劫天子幸鳳翔梁兵圍之茂貞求與梁和

建間遣人聘岐許出兵為援勸勿和令王宗滌將兵五

萬聲言迎駕以攻興元執節度使李繼業

通鑑作李繼密

武定

節度使拓拔思敬遂以其地降建于是并有山南西道

荆南成汭死襄州趙匡凝遣其弟匡明襲據之建乘間

攻下夔施忠萬四州三年八月唐封建蜀王四年唐遷

都洛陽改元天祐建與唐隔絕不通故仍稱天復天復

六年進取歸州于是并有三峽七年梁滅唐遣使諭建

建不納因馳檄四方會兵討梁皆不應秋七月建即皇

帝位以明年為武成元年國號蜀封其諸子為王以王

宗佶為中書令韋莊為左散騎常侍判中書門下事唐襲為樞密使鄭騫為御史中丞張格王鉞為翰林學士周博雅為成都尹武成元年正月祀天南郊大赦以王宗佶為太師罷政事宗佶建養子後建子元懿等稍長宗佶心不自安與鄭騫等謀作亂求為大司馬總六軍開元帥府凡軍事便宜行而後聞建心疑之未許復為唐襲所讒建益疑其反宗佶入奏事請不已遂叱衛士撲殺之并賜騫死六月以遂王宗懿為皇太子武成二

年頒永昌歷三年十二月大赦改明年為永平元年李
茂貞自山南入于蜀地狹勢孤乃與建和以其子娶建
女因求山南故地建怒不與以王宗侃為北路都統宗
佑宗賀唐襲為三面招討使以攻岐戰于青泥宗侃敗
績退保西縣為茂貞兵所圍建自將擊敗之岐兵解去
建至興元而還初田令孜之為監軍也盜唐傳國璽入
蜀埋之二年尚食使歐陽柔治令孜故第得之以獻梁
遣光祿卿盧玘來聘推建為兄其印文曰大梁入蜀之

印宰相張格曰唐故事奉使四方其印文曰大唐入某國之印今梁以兄事陛下奈何卑我建怒欲殺梁使者格曰此梁有司之過爾不可以絕兩國歡已而梁太祖崩建遣將作監李紘弔之遂刻其印文曰大蜀入梁之印三年太子元膺初名宗懿更名宗坦復更元膺殺太子少保唐襲元膺狼喙齟齬多材藝年十七為皇太子判六軍創天武神機營開永和府置官屬唐襲建之嬖也元膺易之屢詭于朝廷懼其交惡乃出襲為興元節度使已而罷歸

元膺廷疏其惡建益不悅是月七夕元膺召諸王大臣
置酒而集王宗翰樞密使潘峭翰林學士毛文錫不至
元膺怒明日入白建言峭及文錫離間諸王建怒將罪
峭等元膺出而襲入建問之襲曰太子將謀亂欲召諸
王諸將以兵錮之然後舉事建疑之襲請召屯營軍入
衛元膺聞襲召兵以為誅已召大將徐瑤常譙率兵拒
襲戰于神武門襲中流矢墜馬死按通鑑載元膺率徐
瑤常譙攻襲于清風
樓遂至城西斬之十國紀年云元膺遣天武將唐榘帥
親兵逐襲至城西斬之九國志云瑤譙等以所部兵挾

元膺以逐唐襲建急召宗侃等討寇乃逐唐襲至城
西斬之又自大安門啓陴入攻瑤謙等與歐史互異建
遣王宗賀以兵討之元膺兵潰乃匿躍龍池艦中明日
出丐食蜀人識之以告建遣宗翰招諭之已為衛兵所
殺建乃立鄭王宗衍為太子四年荆南高季昌侵蜀巫
山遣嘉王宗壽敗之于瞿唐殺黔南節度使王宗訓南
蠻攻掠界上遣夔王宗範敗之于大渡河五年遣王宗
儔等攻岐取秦鳳階成四州至大散關梁叛將劉知俊
在岐以其族來奔十二月改明年元曰通正通正元年

遣王宗綰等率兵十二萬攻岐取隴州八月起文思殿
購羣書實之以內樞密使毛文錫為文思殿大學士十
二月改明年元曰天漢國號漢天漢元年殺劉知俊十
二月大赦改明年元曰光天國復號蜀光天元年六月
建卒建性詐妄好為纖緯詭怪之說自天復七年巨人
見青城山鳳凰見萬歲縣黃龍見嘉陽江而諸州皆言
甘露白鹿白雀龜龍之瑞于是遂僭號兩川希旨者乃
爭言符瑞麟鳳駒虞合穗連理之屬史不絕書晚多內

寵賢妃徐氏與妹淑妃用事交結宦者唐文扆等文扆判六軍事無大小皆取決及建疾以兵入宿衛謀盡去建故將大臣皆不得入見宗弼等排闥入言文扆欲為變乃殺之建因以老將大臣多許昌故人必不為太子用乃以宦者宋光嗣為樞密使判六軍建卒諡曰神武聖文孝德明惠皇帝廟號高祖

衍字化源建第十一子舊名宗衍既立去宗名衍初封鄭王其母徐賢妃也元膺死徐妃與宦者唐文扆教相

士言衍相最貴又諷宰相張格贊成之由是得立為太子及嗣立尊母賢妃為皇太后徐淑妃為皇太妃衍年少荒淫委政于宦者宋光嗣光葆景潤澄王承休歐陽晃田魯儔等而以韓昭潘在迎顧在珣嚴旭等為狎客起宣華苑與諸狎客婦人日夜酣飲其中嘗以九日宴宣華苑嘉王宗壽以社稷為言言發流涕韓昭等曰嘉王酒悲爾諸狎客共以慢言詭嘲之衍不能省也嘗與太后太妃游青城山宮人衣服皆畫雲霞望之飄然若

仙衍自作甘州曲述其狀上下山谷間嘗自歌而使宮
人和之明年改元乾德乾德元年正月祀天南郊大赦
二年北巡至于西縣旌旗戈甲連亘百餘里不絕所在
供億人不堪命三年正月還成都六年以王成休為天
雄軍節度使承休以宦者得幸妻嚴氏有絕色衍通之
以故得鎮時唐莊宗滅梁遣李嚴聘蜀見其人物富盛
而衍驕淫歸乃獻策伐蜀明年唐魏王繼岌郭崇韜來
伐是歲衍改元咸康衍遊幸無度十月將幸秦州行至

縣谷而唐師入境衍懼遽還留王宗弼守縣谷遣王宗
勲宗儼宗昱率兵以拒唐師宗勲等至三泉望風退走
衍詔宗弼誅宗勲等宗弼反與宗勲等合謀送款衍還
至成都御文明殿與羣臣相對涕泣宗弼亦自縣谷馳
歸登太玄門嚴兵自衛衍往勞之宗弼驕慢無禮已而
劫遷衍于天啓宮通鑑作西宮收璽綬衍即上表乞降繼安
至成都衍君臣面縛輿視出降于七里亭莊宗召衍入
洛賜詔許以封爵誓不背約衍捧詔忻然就道率其宗

族及偽宰相王鐸張格庾傳素許寂翰林學士李昊等
及諸將佐家屬數千人以東行至秦川驛莊宗用伶人
景進計遣宦者向延嗣族之行母徐氏臨刑呼曰吾兒
以一國迎降反以為戮信義俱棄吾知其禍不旋踵矣
衍妾劉氏有色行刑者將免之劉氏曰國家喪亡義不
受辱遂就死當行為淫亂嘉王宗壽常切諫之後為武
信軍節度使唐師伐蜀所在迎降繼岌以書招之獨宗
壽不從聞衍降大慟從衍東遷至岐陽略守者得入見

衍衍泣曰早從王言豈有今日衍死宗壽亡入熊耳山
天成二年出詣京師上書求收葬衍宗族明宗嘉之封

衍順正公許以諸侯禮葬宗壽得王氏十八喪葬之長

安南三趙村

徐無黨曰據前蜀書運歷圖九國志皆云建以唐大順二年入成都為西川節度使

天復七年九月建號明年正月改元武成今以為定惟舊五代史云龍紀元年入成都天祐五年建號改元者謬也至後唐同光三年蜀滅則諸書皆同自大順二年至同光三年凡三十五年

王宗滌本姓華名洪頤州人從建為威信都指揮使與
李簡等拒楊守厚于梓州功居多又攻破楊晟于彭州

楊守亮于閬州已又敗顧彥暉于楸林還邛州刺史復將兵攻東川建嘉其功更姓名與諸子齒命為東川留後宗滌言東川封疆五千里文移往還動淹時日請分遂合瀘渝昌五州列為一鎮建表其說于朝置武信軍于遂州未幾唐授宗滌為東川節度使久之加同平章事破李繼業于興元唐即詔為山南東道節度使宗滌有勇畧得將士心建甚忌之會成都作府門繪以朱丹國人謂之畫紅樓建以宗滌姓名應之而王宗佖等疾

其功復構飛語建名宗滌詰責之宗滌曰三蜀略平大王聽讒殺功臣可矣建令親隨指揮使唐襲飲以酒繼殺之成都為之罷市建稱帝乃復其官爵

王宗弼本姓魏字弘夫建錄為假子更今姓名楊守厚攻梓州建遣華洪等救顧彥暉謀因犒師執之宗弼乃以密語泄之彥暉建不為意待之如初已而從攻東川為東川兵所擒彥暉念舊恩畜為子及彥暉敗復歸于建累官兼中書令充北面行營招討使建病且劇以宗

弼沈靜多謀召為馬步軍都指揮使同受遺詔衍立命
宗弼守太師兼中書令判六軍輔政封鉅鹿王進封齊
王時後主不親政事內外遷除皆出自宗弼納賄行私
上下咨怨唐兵入境會王宗勲等師至三泉李紹琛逆
戰宗勲等敗走衍遂命宗弼守利州且令誅宗勲等時
郭崇韜遺宗弼等書為陳利害紹琛未至利州宗弼遽
棄城引兵歸宗勲等追及于白芳宗弼探懷中詔書示
之曰宋光嗣令我殺爾曹因相持而泣遂合謀送款于

唐宗弼歸至成都嚴兵自衛已而劫遷行于天啓宮又使親吏于義興門邀取內庫金帛收成都尹韓昭宦者宋光嗣景潤澄歐陽晃等殺之函首送唐師自稱權西川兵馬留後使其子承班以衍後宮及珍玩賂繼岌及崇韜求西川節度使繼岌曰此我家物也奚以獻為居數日宋光祿自梓州來訴宗弼誣殺光嗣等又崇韜徵犒軍錢數萬緡于宗弼靳不與士卒怨怒夜縱火誼譟宗韜欲殺宗弼以自明白繼岌收宗弼及宗勲宗渥數

其不忠之罪族誅之國人爭食宗弼之肉頃刻而盡

按五

代史前蜀世家諸偽臣俱無附傳考王建開蜀王宗祿
功居最其亡也王宗弼實為禍首兩人事蹟顯著應列
為附傳今並據
十國春秋增補

欽定續通志卷五百九十六

欽定四庫全書

欽定續通志卷五百九十七

載記

四

後蜀

孟知祥 昶

附 高彥儔

趙宗韜

王昭遠

李昊

孟知祥字保盾邢州龍岡人其叔父遷當唐末據邢洺磁三州為晉所據晉使守澤潞梁兵攻晉遷以澤潞降

梁知祥父道獨留事晉及知祥壯晉王以其弟克讓女妻之以為左教練使莊宗為晉王以為中門使前此為中門使者多以罪誅知祥懼罪求他職因薦郭崇韜自代莊宗以為馬步軍都虞候同光元年以太原為北京授知祥太原尹北京留守魏王繼岌伐蜀郭崇韜為招討使崇韜臨訣白莊宗曰即臣等平蜀陛下擇帥守西川無如孟知祥者及破蜀莊宗遂以為成都尹劍南西川節度副大使四年正月知祥至成都而崇韜已死繼

岌引軍東歸先鋒康延孝反知祥遣將會任圜等兵擊破之得其將李肇侯弘實及兵數千以歸會莊宗崩魏王繼岌死明宗入立知祥乃訓練兵甲陰有王蜀之志益置義勝定遠驍銳義寧飛掉等軍七萬餘人命李仁罕趙廷隱張業等分將之初魏王繼岌郭崇韜令蜀富民輸犒軍錢六百萬緡其餘者猶二百萬任圜自蜀入

相兼判三司素知蜀所餘錢是冬明宗加知祥侍中

按蜀

樞机作檢校太傅李昊羊馬城記作加以太僕卿趙季太尉兼侍中通鑑作加侍中與歐史同

良齋官告賜之因以為三川置制使督蜀犒軍餘錢送京師且制置兩川征賦知祥拒命然與季良有舊因留之知祥初鎮蜀莊宗以宦者焦彥賓為監軍明宗立悉誅宦者罷諸道監軍彥賓已罷樞密使安重誨復以客省使李嚴為監軍以制知祥知祥怒曰諸道皆廢監軍獨吾軍置之是嚴欲以蜀再為功也天成二年嚴至成都知祥置酒召嚴時彥賓猶在蜀嚴于懷中出詔令知祥誅之知祥不聽因責嚴曰今諸方鎮已罷監軍公何

得來此目客將王彥銖執斬之明宗不能詰知祥之入蜀也遣人迎家屬于太原行至鳳翔節度使李從暉聞嚴被殺以為知祥反矣遂留之明宗猶欲懷以恩信詔遣知祥家屬歸蜀復遣客省使李仁矩慰諭之知祥因請以趙季良為節度副使事無大小皆與參決三年唐徙季良為果州團練使以何瓚為節度副使知祥遣其將雷廷魯至京師請留季良而以瓚為行軍司馬明宗不得已從之是歲唐伐荆南詔知祥以兵下峽知祥遣

毛重威率兵三千戍夔州已而高季興死其子從誨歸命知祥請罷戍兵不許及諷重威以兵潰歸唐以詔書罪重威知祥不奉詔初魏王繼岌東歸留精兵五千戍蜀董璋鎮東川與知祥未嘗通問自重誨疑二人有異志乃以親信分守兩川管內諸州而以精兵為其牙隊以夏魯奇鎮遂州李仁矩鎮閬州又以武虔裕為縣州刺史仁矩與璋有隙而虔裕重誨外兄由是璋與知祥皆懼璋始遣人求婚于知祥以自結知祥許之于是合

從以拒唐請罷還唐所遣節度刺史等明宗優詔慰諭
之長興元年明宗郊加拜知祥中書令九月董瑋反攻
破閬州擒李仁矩殺之知祥亦遂舉兵反是秋明宗改
封瓊華公主為福慶長公主遣祕書監劉岳為冊使行
至鳳翔聞知祥反乃旋詔奪知祥官爵命天雄軍節度
使石敬瑭為都招討使夏魯奇為副知祥遣李仁罕張
業趙廷隱將兵三萬人會瑋攻遂州別遣侯弘實將四
千人助瑋守東川又遣張武下峽取渝州

按通鑑董瑋
以長興元年

八月先反九月知祥約董璋同舉兵璋引兵擊閬州知祥即遣李仁罕等將兵三萬攻遂州別遣侯弘實孟思恭會璋攻閬州是月荆董璋官爵以石敬瑭為東川行營招討使夏魯奇為之副以知祥兼西南供饋使注云知祥已攻遂州朝廷豈不知之猶欲懷輯之以間董璋耳至十一月唐師攻劍門克之乙亥始詔荆知祥官爵歐史作董璋反在九月叙奪知祥官爵于命敬瑭討蜀之前叙知祥遣李仁罕等于命敬瑭討蜀之復會璋攻閬州亦作守東川與通鑑俱不合

唐師攻劍門殺璋守兵三千人遂入

劍門璋來告急知祥大駭遣廷隱分兵以東已而聞唐軍止劍州不進喜曰使唐軍急趨東川則遂州圍解吾勢沮而兩川搖矣今其不進易與也十二月敬瑭及廷

隱戰于劍門敗績時張武已取渝州病卒其副將袁彥超代將其兵取黔州二年李仁罕克遂州夏魯奇死之知祥以仁罕為武信軍留後遣人馳魯奇首示敬瑭軍敬瑭乃班師利州李彥珂聞唐軍敗歸乃棄城走知祥以廷隱為昭武軍留後仁罕進攻夔州刺史安崇阮棄城走以趙季良為留後時唐軍涉險轉饋為艱敬瑭軍既旋所在守將皆棄城走明宗以為釁由重誨及重誨誅死乃遣西川進奏官蘇愿進奉軍將杜紹本招諭知

祥具言家屬在京師者皆無恙知祥聞重誨死而唐厚待其家乃邀璋欲同謝罪璋不聽乃遣觀察判官李昊說璋璋益疑知祥賣已語侵昊昊乃勸知祥攻之而璋先襲破漢州知祥遣趙廷隱率兵三萬自將擊之陣雞

距橋

按薛史作知祥與廷隱等逆戰于金鴈橋通鑑作廷隱陣于雞蹤橋

知祥得璋降卒

衣以錦袍使持書招降璋曰事已及此不可悔也璋軍士欲戰乃麾軍前進鋒始交璋偏將張守進來降知祥乘之璋大敗過金鴈橋麾其子光嗣使降以保家族光

嗣哭曰自古豈有殺父而求生者乎寧俱就死因與璋俱走至梓州璋見殺光嗣自縊死知祥遂并有東川然自璋死知祥卒不遣使謝唐唐樞密使范延光曰知祥雖已破璋必借朝廷以為兩川重非屈意招之亦不能自歸也明宗然之先是克寧妻孟氏知祥妹也莊宗殺克寧孟氏歸于知祥其子瓌留事唐為供奉官明宗即遣瓌歸省其母因賜知祥詔書招慰之知祥兼據兩川以趙季良為武泰軍留後李仁罕武信軍留後趙廷隱

保寧軍留後張業寧江軍後後李肇昭武軍留後季良等因請知祥稱王以墨制行事議未決而瓌至蜀知祥見瓌倨慢瓌自蜀還得知祥表請除季良等為五鎮節度其餘刺史以下得自除授又請封蜀王且言福慶公主已卒明宗為之發哀遣閤門使劉政恩為宣諭使政恩復命知祥始遣其將朱晃來朝四年二月以知祥檢校太尉兼中書令行成都尹劍南東西兩川節度使封蜀王季良等五人皆拜節度使十一月明宗崩明年閏正

月知祥乃即皇帝位國號蜀以趙季良為司空同平章
事中門使王處回為樞密使李昊為翰林學士三月唐
潞王舉兵反山南西道節度使張虔釗武定軍節度使
孫漢韶皆以其地來附四月改元曰明德六月知祥病
知祥得風疾踰年至是遂劇以其子昶為皇太子監國
知祥卒諡曰文武聖德英烈明孝皇帝廟號高祖

昶字保元初名仁贊知祥第三子知祥為兩川節度使
昶為行軍司馬及僭號以昶為東川節度使同平章事

知祥辛祕不發喪王處回夜過趙季良相對涕泣季良正色曰今彊侯握兵伺變當速立嗣君以絕非望泣無益也處回遂與季良立昶而後發喪昶立不改元仍稱

明德至五年始改元曰廣政

按宋使作四年改元廣政十國春秋亦作四年十二

月明德二年尊母李氏為皇太后昶好打毬走馬多採

良家子充後宮樞密副使韓保貞切諫昶悟即日出之有上書者言臺省官當擇清流昶嘆曰何不言擇人而任之左右請詰上書者昶曰吾見唐太宗初即位獄吏

孫伏伽上書言事皆見嘉納奈何勸我拒諫耶然昶年
少不親政事將相大臣皆知祥故人驕蹇踰法多營田
宅而李仁罕張業尤甚昶即位數月執仁罕殺之族其
家時李肇自鎮來朝杖而入見稱疾不拜及聞仁罕死
遽釋杖而拜廣政九年趙季良卒張業益用事業仁罕
甥也仁罕被誅時業方掌禁兵昶懼其反乃用以為
相業兼判度支置獄于家以酷法厚斂蜀人大怨十二
年昶與匡聖指揮使安思謙謀執而殺之王處回趙廷

隱皆致仕由是故將舊臣殆盡昶始親政事置匭以通下情時漢高祖起太原中國多故雄武軍節度使何建以秦成階三州來附昶因遣孫漢韶攻下鳳州于是悉有王衍故地漢將趙思綰據永興王景崇據鳳翔反皆送款于昶乃遣張虔釗何建李廷珪分道出師應思綰以窺關中又遣安思謙益兵以東已而無功遂執思謙斬之十二年置吏部三銓禮部貢舉十三年封子玄詰秦王判六軍事次子玄珪褒王弟仁毅夔王仁贄雅王

仁裕嘉王十八年周世宗伐蜀攻自秦州遣高彥儔李

廷珪出堂倉以拒周師彥儔大敗走青泥于是秦成階

鳳復入于周昶懼遂聚蜀粟于劍門募兵既多國用不

足因鑄鐵錢權境內鐵器以需其利

按十國紀年蜀史云鑄鐵錢在廣政

二十五年考曾鞏隆平集云昶聞周世宗下秦鳳多積蜀粟始以鐵為錢十國春秋亦云初鐵錢多于外郡至

二十五年遂流入成都非二十五年始鑄也鑄鐵錢事當在是時今據隆平集改輯又分遣使者

聘南唐東漢以張形勢二十年世宗歸蜀昶亦歸所

獲周將胡立等因寓書于世宗稱大蜀皇帝世宗怒其

無禮不答時周兵伐南唐取淮南十四州諸國皆懼荆
南高保融以書招昶使歸周昶以前嘗致書世宗不答
乃止二十五年立秦王玄喆為皇太子宋興已下荆潭
昶益懼遣大程官孫遇及趙彥韜揚蠲約東漢共出兵
以撓中國遇為邊吏所得彥韜潛取蠟丸帛書以告宋
宋太祖遂詔伐蜀遣王全斌崔彥進等出鳳州劉光乂
曹彬等出歸州率兵五萬人分路進攻並令遇等為鄉
導及兵至昶遣王昭遠趙彥韜等拒之昶母李氏謂曰

吾見莊宗及汝父時非有功者不使主兵故人皆畏服
樂為之用昭遠輩素不知兵一旦邊警急何以禦敵惟
高彥儔汝父舊人可委任之昶不聽又遣子玄詰率精
兵數萬守劍門全斌至三泉遇昭遠擊敗之昭遠焚吉
柏江浮橋退守劍門全斌遣偏將史延德分兵出來蘇
小道北擊劍門而自由大路夾攻之昭遠彥韜皆被擒
玄詰亦逃歸劉光乂攻夔州守將高彥儔戰敗閉牙城
拒守尋自焚死而蜀兵所在奔潰昶益窮蹙問計于左

右老將石顯

宋史作斌

以為東兵遠來勢不能久宜堅守以

敵之昶歎曰吾父子以溫衣美食養士四十年一旦臨

敵不能為吾東向放一箭雖欲堅壁誰與吾守者耶乾

德三年正月遣通奏使伊審微齎表詣全斌請降且乞

保全家屬又遣其弟仁贄詣闕上表詔慰勞之四月昶

與母至京師素服待罪闕下宋太祖御崇元殿修禮見

之先是詔有司于右掖門外臨汴水起大第五百餘間

以待昶供帳悉備至是賜之拜昶檢校太師兼中書令

封秦國公七日而卒追贈楚王謚恭孝其母不哭以酒
酹地曰汝不能死社稷苟生以取羞吾所以忍死者以
汝在也今何用生為因不食卒太祖聞而傷之令鴻臚
卿范禹偁護喪事與昶俱葬洛陽玄喆歸朝與昶同日
宣制拜檢校太尉秦寧軍節度使後移鎮貝定二州太
平興國中從平太原又從征幽州又破契丹于徐河以

功封滕國公淳化初卒

徐無黨曰知祥興咸年數甚明
諸書皆同蓋自同光二年乙酉

入蜀至乾德三年乙丑國戚凡四十一年惟舊五代史
云同光三年丙戌至乾德三年乙丑四十年者謬也

高彥儔并州太原人從知祥入蜀為昭武軍監押昶嗣位遷邛州刺史改馬步軍使漢兵入大散關克安都砦彥儔以所部先進漢兵遁去彥儔盡銳追之復其砦而還未幾拜源州武定軍節度周顯德初向訓攻鳳州昶令彥儔出兵解圍未至聞敗軍于堂倉潰歸判官趙玘閉關不納乃遁還成都昶不之罪尋授夔州寧江軍都巡檢置制招討使宋師至彥儔謂副使趙崇濟監軍武守謙曰北軍涉遠而來利速戰不如堅壁待之守謙不

從獨領麾下以出遂敗彥儔將以所部出戰宋師已乘
城入判官羅濟勸令單騎歸成都彥儔曰我昔已失秦
州今夔州復不能守縱不我殺亦何面目見蜀人乎濟
又勸其降不可曰今日止有死耳遂望西北再拜登樓
縱火自焚死

按九國志云宋師壞門入彥儔
挺劍拒之殺十數人乃焚死

初昶母語

昶惟彥儔可任及是果能死難

趙宗韜并州太原人父廷隱隨知祥入蜀董璋襲成都
廷隱大破之知祥遂有其地及僭號累遷至太師中書

令封宋王卒崇韜驍果有父風昶取將家及死事孤子
置殿直四番以崇韜為都知領之周世宗克秦鳳將入
蜀境為崇韜拒退歷洋州武定軍節度山南武定緣邊
諸砦都指揮副使漢源之戰獨策馬先登及軍敗猶手
擊殺十數人為宋師所擒

王昭遠益州成都人幼孤貧年十三依東郭僧智諲為
童子知祥嘗飯僧于府昭遠持巾履從智諲入時昶方
就學知祥見昭遠慧黠留給事左右昶嗣位以為捲簾

使樞密使王處回致仕

宋史作出
知梓州

昶以樞密權重難制

乃以昭遠為通奏使知樞密院事機務一以委之府庫
財帛恣其取不問昭遠以方畧自許宋師入境昶令與
趙宗韜率兵拒戰發成都遣李昊等餞郊外昭遠酒酣
攘臂曰是行也非止克敵當領此二三萬雕面惡少兒
取中原如反掌耳及行執鐵如意指麾軍事自方諸葛
亮將至漢源聞劍門已破惶恐失次宗韜布陣將戰昭
遠益窮蹙而無計俄宗韜敗乃免胄棄甲走投東川匿

倉舍下悲嗟流涕目盡腫為追騎所執送闕下宋太祖
釋之授左領軍衛大將軍開寶八年卒

李昊字穹佐自言唐相紳之後昊生于關中唐末昊父
羔攜家避亂至奉天奉天為岐軍所破父及弟妹皆被
殺獨昊與母得免乃流寓新平劉知俊領岐軍圍州城
昊踰城出為候騎所得知俊與語甚器之妻以女遂隨
知俊歸蜀王衍襲位歷中書舍人翰林學士乃遣人間
道迎其母蜀亡入洛明宗令昊入蜀詔孟知祥趙季良

量授一職久之知祥辟為掌書記及稱帝擢禮部侍郎翰林學士昶立累加尚書左丞拜門下侍郎同平章事俄加左僕射自知祥時章奏書檄皆出昶手集為百卷曰經緯畧又修前蜀書四十卷並上之封趙國公加司空初宋之下荆湖也昶言于昶曰臣觀宋氏啟運不同漢周一統其在此乎若修職修貢亦保安三蜀之良策也為王昭遠所沮而止蜀平隨昶入朝宋太祖優待之拜工部尚書卒昶前後仕蜀五十年昶之世位兼將相

秉利權資貨歲入鉅萬奢侈尤甚初王衍降莊宗昊為
草表昶之降也其表亦昊所為蜀人潛署其門曰世修

降表李家見者哂之

按宋史後蜀世家此下有孟仁贊
仁裕仁操及伊審微龍景昭章寅

遜李廷珪母守素歐陽迴等
附傳俱無事蹟足錄今從刪

欽定續通志卷五百九十七